

## II. XUSUSIY KORXONA TUZISH VA UNI DAVLAT RO'YXATIDAN O'TKAZISH

### 8-modda. Xususiy korxona tuzish tartibi

Xususiy korxona mulkdor tomonidan tuziladi, mulkdor unga tegishli mol-mulk beradi va uning ustavini tasdiqlaydi.

Xususiy korxona, agar uning ustavida boshqacha qoida belgilangan bo'lmasa, nomuayyan muddatga tuziladi.

### 9-modda. Boshqa yuridik shaxslarni ta'sis etish. Xususiy korxonaning vakolatxonalari va filiallari

Xususiy korxona qonun hujjatlarida belgilangan tartibda boshqa yuridik shaxslarning muassisi bo'lishga yoki ularning ustav fondida o'zgacha tarzda ishtirok etishga, vakolatxonalar ochishga va filiallar tuzishga haqli.

*Batafsil ma'lumot uchun O'zbekiston Respublikasi Fuqarolik kodeksining [47-moddasiga](#) va "O'zbekiston Respublikasi yuridik shaxslari tomonidan chet elda tashkilotlar tashkil etish yoki ularning ustav fondi (kapitali)da ulush bilan ishtirok etish to'g'risida xabardor etish tartibi haqida"gi [nizomga](#) (ro'yxat raqami 2457, 17.05.2013-y.) qarang*

.

### 10-modda. Xususiy korxonaning ustavi

Xususiy korxonaning ta'sis hujjati uning ustavidir.

Xususiy korxonaning ustavida quyidagilar ko'rsatilishi kerak:

korxonaning firma nomi;

uning joylashgan yeri va pochta manzili to'g'risidagi ma'lumotlar;

asosiy faoliyat turlarining ro'yxati;

mulkdorning familiyasi, ismi, otasining ismi va yashash joyi;

ustav fondining miqdori.

Xususiy korxonaning ustavi qonun hujjatlariga zid kelmaydigan boshqa qoidalarni ham o'z ichiga olishi mumkin.

### 11-modda. Xususiy korxonani davlat ro'yxatidan o'tkazish

Xususiy korxona davlat ro'yxatidan o'tkazilgan paytdan boshlab yuridik shaxs maqomiga ega bo'ladi.

Xususiy korxonani davlat ro'yxatidan o'tkazish qonun hujjatlarida belgilangan tartibda amalga oshiriladi.

*Batafsil ma'lumot uchun qarang: Vazirlar Mahkamasining 2017-yil 9-fevraldagi 66-son qarori bilan tasdiqlangan "Tadbirkorlik subyektlarini davlat ro'yxatidan o'tkazish tartibi to'g'risida nizom".*

### 12-modda. Xususiy korxonaning ustav fondi

Xususiy korxonaning ustav fondi bo'linmasdir va uni mulkdorning o'zi belgilaydi.

Pul, qimmatli qog'ozlar, pul bilan baholanadigan boshqa mol-mulk yoki mulkiy huquqlar yoxud boshqa shaxsga beriladigan o'zga huquqlar xususiy korxonaning ustav fondiga qo'shiladigan hissa bo'lishi mumkin. Mulkdor xususiy korxonaning ustav fondiga o'zi kiritadigan mol-mulkni mustaqil baholaydi.

Agar xususiy korxonaning ustav fondi shakllantirilayotganda mulkdor o'z oila a'zolarining umumiy (ulushli yoki birgalikdagi) mulki hisoblangan mol-mulkni korxonaga berayotgan bo'lsa, ushbu mol-mulkning barcha mulkdorlaridan notarial tasdiqlangan rozilik olish talab etiladi.

### 13-modda. Xususiy korxonaning ustav fondini ko'paytirish va kamaytirish

Xususiy korxonaning ustav fondini ko'paytirish va kamaytirish mulkdorning qaroriga ko'ra xususiy korxonaning ustaviga o'zgartishlar kiritish yo'li bilan amalga oshiriladi.

Agar ikkinchi moliya yilining va shundan keyingi har bir moliya yilining yakunida xususiy korxona sof aktivlarining qiymati uning ustav fondidan kam ekanligi ma'lum bo'lib qolsa, xususiy korxona o'z ustav fondini o'zining sof aktivlari qiymatidan oshmaydigan miqdorda kamaytirishi shart.

Xususiy korxona sof aktivlarining qiymati qonun hujjatlarida belgilangan tartibda aniqlanadi.